

सखियों मंगल गावो ये ।

सतगुरु आज पधारिया चरणां पड़ जावो ये ॥टेर ॥

पग पाँवड़ा करो तन मन से, हृदय बिछावो ये ।

चरण धोय नैणा के जल, चरणामृत पावो ये ॥1॥

नम्र भाव का जल लेकर के, स्नान करावो ये ।

पाँच तीन का वस्त्र टेक, टोपा पहनावो ये ॥2॥

चित का चन्दन घोटकर, मस्तक चिर्चाओ ये ।

धर्म, अर्थ और काम मोक्ष के, पुष्प चढ़ाओ ये ॥3॥

इड़ा पिंगला साजकर, दो दीप जलावो ये ।

अग्नि, ज्ञान की ल्याय ध्यान को धूप जलावो ये ॥4॥

नवधा भक्ति की बाती कर, आरती सजाओ ये ।

अनहद घण्ट बजाय कर, उन मुन धुन ल्यावो ये ॥5॥

अमी झरै दिन रैन, ताहि का भोग लगावो ये ।

धार दानता प्राण वायु का, चवँर दुलावो ये ॥6॥

शिखर महल के माय सुषम्ना सेज बिछाओ ये ।

सोहं सांह गाय कर गुरुदेव रिझायो ये॥7॥

अमृत भेद अपार है सहजांही लख पावा ये ।

सुरति ठिकाणै ल्याय कर शंकर गुण गावां ये ॥8॥